



REPUBLIKA E KOSOVËS - REPUBLIKA KOSOVO	
KOMUNA E VUSHTRRIË - OPŠTINA VUČITRN	
01 Nr. / Br	190 / 22
Nr. i fq. / Br. st	- 18 -
Data: / Datum	28. 07. 2022
VUSHTRRI - VUČITRN	



REPUBLIKA E KOSOVËS

KUVENDI I KOMUNËS-VUSHTRRI

PROCESVERBAL
NGA MBLEDHJA E -V- E RRREGULLT E KUVENDIT TË KOMUNËS SË
VUSHTRRIË, MBAJTUR MË 30 QERSHOR 2022

Mbledhja është mbajtur në sallën e Kuvendit të Komunës së Vushtrrisë, duke filluar në orën 10:15. Në këtë mbledhje ishin të pranishëm anëtarët e Kuvendit të Komunës së Vushtrrisë:

Adnan Lahu, Agim Bregaj, Agron Përçuku, Alban Bajrami, Ali Januzi, Arlind Gogolli, Behar Duraku, Bekim Zabërgja, Blerina Shala, Bujar Pllana, Edona Gashi, Fakete Dushi, Fatmire Cecelia, Galip Avdiu, Gresa Muli, Ilmi Azemi, Kushtrim Hyseni, Leonora Gërguri, Lorik Maxhuni, Mek Selaci, Melihate Basholli-Latifi, Mensur Kasumi, Mensur Kastrati, Mentor Hasani, Nurie Halili, Nurten Çerkezi-Gjyshinca, Refik Maloku, Shkelzen Xhaferi, Sylejman Meholli, Ymer Haradinaj dhe Zojë Hajrizi.

Mungoi: Gentiana Rama, Spasoje Stefanoviq, Nasuf Aliu dhe Faton Hyseni.

Mbledhjen e hapi dhe e kryesoi Melihate Basholli-Latifi, – kryesuese e kuvendit, e cila konstatoi se në sallë janë prezent 31 anëtarë të kuvendit, kuorum ky i mjaftueshëm për zhvillimin e punimeve të mbledhjes plenare dhe për marrje të vendimeve të plotfuqishme, andaj procedoi me rendin e ditës.

Të pranishëm në këtë mbledhje ishin edhe i autorizuari i Kryetarit të komunës, z. Alban Tahiraj, përfaqësuesi i KFOR-it, përfaqësuesi i OSBE-së, përfaqësues të mediave të shkruara dhe elektronike, përfaqësues të shoqërisë civile.

Melihate Basholli-Latifi, kryesuese e kuvendit - lexoi para anëtarëve të kuvendit dispozitat e Rregullores të punës së kuvendit, lidhur me diskutimet, si dhe kërkoi që të respektohen këto dispozita ligjore ashtu që të jemi racional në kohë në mbledhjen e kuvendit. Njëkohësisht ajo paraqiti para kuvendit pikat e rendit të ditës që janë dërguar si materiale në pikën në të ndryshime, për t'i inkorporuar në punimet e mbledhjes.

Sylejman Meholli, anëtar i kuvendit – pasi i përshëndeti të pranishmit, dhe duke ju referuar kryesueses së kuvendit e cila kërkon seriozitet në punë, vlerësoi se ajo do të duhej që vet të jetë serioze, pasi që në mbledhjen e fundit të KPF-së si rekomandim ka qenë edhe pika e rendit të ditës

që lidhet me Diskutimin për anulimin e konkurseve për emërimin e drejtorëve dhe zëvendës-drejtorëve të shkollave në Komunën e Vushtrisë. Ky rekomandim ishte aprovuar me shumicë votash në mbledhjen e Komitetit për Politikë dhe Financa, dhe ka qenë obliguese që ekzekutivi të përgatitë materialin dhe kryesuesja e kuvendit ka pasur obligim që këtë pikë ta inkorporojë në rendin e ditës për këtë mbledhje të kuvendit. Mosrespektimi i vendimeve që dalin nga Komiteti për Politikë dhe Financa dhe mosprocedimi i tyre në kuvend, është një praktikë jo e mirë dhe jodemokratike dhe që nuk lë mënyrë dhe mjetë dhe formë pa shfrytëzuar për t'i ikur debatit dhe përgjegjësisë. Në këtë mbledhje nuk është prezent kryetari dhe nënkryetari i komunës, si dhe drejtoresha e arsimit, për më keq dhe më tepër sot nuk është respektuar një vendim i Komitetit për Politikë dhe Financa i cili është aprovuar me shumicë votash dhe për procedim në kuvend, për këtë ekzistojnë dëshmitë siç është video-incizimi i mbledhjes së KPF-së e për të cilën i bën ftesë MAPL-së që ato dëshmi t'i shqyrtojë dhe të konstatojë se çfarë shkeljesh po ndodhin në Kuvendin e Komunës së Vushtrisë. Pastaj përsërit se kjo nuk është në rregull është jodemokratike, dhe për më tepër është antiligjore dhe e papranueshme, sepse nuk mund të shtypet debati nuk mund t'i ikni përgjegjësisë. Nëse keni kësi lloj qasjesh për arsim, atëherë ky është lajm i keq për mësimdhënësit, nxënësit, prindërit dhe për interesin qytetar në përgjithësi. Në fund tha se për grupin kuvendar të LVV-së kjo qasje është e papranueshme dhe se këtë çështje si grup kuvendar do ta iniciojnë edhe në instancat tjera për zbardhur deri në fund dhe për të parandaluar qasjen e shkeljeve flagrante që po ndodhin në fushën e arsimit në Komunën e Vushtrisë.

Melihate Basholli-Latifi, kryesuese e kuvendit – tha se askush nuk është duke i ikur debatit, porse fakti se kryetari i komunës dhe drejtoresha e arsimit ndodhen jashtë shtetit, është menduar dhe koordinuar që debati për arsimin dhe çështjet e konkurseve, të debatohen në ndonjërin nga mbledhjet e radhës kur të jetë prezent kryetari i komunës dhe drejtoresha e arsimit.

Albanez Tahiraj, i autorizuari i Kryetarit të komunës - pasi përshëndeti të pranishmit, sqaroi se në mbledhjen e Komitetit për Politikë dhe Financa nuk ka pasur vendim, por ka qenë një rekomandim i cili nuk është inkorporuar fare në rendin e ditës. Për më tepër është propozuar si rekomandim që të futet në rend të ditës në mbledhjen e kuvendit, por procedurëalisht, rendi i ditës dërgohet sipas propozimit të kryesueses së kuvendit dhe kryetarit të komunës, por pika e njëjtë paraprakisht nuk është propozuar për t'u futur në rend të ditës, Kjo mund të sqarohet dhe dëshmohet nga incizimet e mbledhjes të Komitetit për Politikë dhe Financa dhe nga procesverbali.

Sylejman Mehulli, anëtar i kuvendit – njoftoi se nuk është e vërtetë që nuk është votuar në mbledhjen e KPF-së, për pikën-rekomandimin për debat për anulimin e konkurseve në arsim, dhe kjo mund të dëshmohet edhe nga përfaqësuesit e LDK-së që kanë qenë prezent në mbledhje, por edhe nga incizimi i mbledhjes dhe procesverbalit. Më tej ai kërkoi nga kryesuesja e kuvendit që mos t'i ndërpritet fjala gjatë diskutimit nga i autorizuari i kryetarit të komunës, për faktin se ai është në kuvend si rezultat i votës qytetare, për t'i mbrojtur interesat e përgjithshme, ndërsa i autorizuari i kryetarit të komunës nuk është aty nga votat e qytetarëve. Në fund kërkoi nga kryesuesja e kuvendit që të futet në rend të ditës pika rekomandimi i KPF-së për debat lidhur me anulimin e konkurseve në arsim.

Ismet Gashi, udhëheqës i Zyrës ligjore-sqaroi se sa i përket propozimit të përfaqësuesit të LVV-së lidhur me votimin në mbledhjen e Komitetit për Politikë dhe Financa, është gjithçka e qartë, është propozuar dhe aprovuar rekomandimi. Mirëpo duhet pasur parasysh se rendin e ditës për mbledhjet e kuvendit e propozon kryesuesja e kuvendit në bashkëpunim me kryetarin e komunës sipas dispozitave të Statutit të komunës, Ajo pikë është propozuar që të futet në rend të ditës, mirëpo nuk është obliguese që të jetë në rend të ditës, sepse kuvendi e ka themeluar Komitetin për Politikë dhe Financa dhe ky i fundit nuk mund ta detyrojë në veprim pasi që është trup i kuvendit.

Ndërsa e drejta e anëtarit të kuvendit për propozim për pikë të rendit të ditës është e patjetërsueshme edhe pa rekomandim të Komitetit për Politikë dhe Financa.

Agron Përçuku, anëtar i kuvendit – sqaroi se në mbledhjen e Komitetit për Politikë dhe Financa, është votuar rekomandimi që të ketë debat lidhur me konkuret e anuluar në Drejtorinë e Arsimit, si pikë e rendit të ditës në këtë mbledhje të kuvendit. Këtë çështje ai e ka mbështetur dhe do ta mbështet çdo çështje që lidhet me interesin e përgjithshëm qytetar. Andaj si përfaqësues i LDK-së e mbështet propozimin që të diskutohet për çështjen e atyre konkurseve në cilëndo mbledhje të kuvend, me qëllim që të sqarohet çështje për të cilën pretendohet se ka pasur shkelje.

Ilmi Azemi, anëtar i kuvendit - pasi i përshëndeti të pranishmit, tha se në mbledhjen e KPF-së është votuar propozimi i përfaqësuesit të LVV-së për debat lidhur me konkuret, por nga opinionimi i marr nga Zyra ligjore konstatohet se nuk është obliguese që rekomandimet e votuara në KPF, detyrimisht të dërgohen edhe në kuvend. Pavarësisht kësaj është e drejtë e secilit anëtar të kuvendit të propozojë pikë për futje në rendin e ditës para aprovimit të rendit të ditës. Më tej sugjeroi përfaqësuesit në KPF, që në të ardhmen propozimet e tyre të bëhen në mbledhjet e KPF-së që të jenë për diskutim dhe shqyrtim në ato mbledhje dhe më tej të procedohen për mbledhjet e kuvendit. Në fund kërkoi nga të gjithë që të jenë konstruktiv dhe diskutimet e tyre të orientohen në zgjidhjen e problemeve të qytetarëve.

Adnan Lahu, anëtar i kuvendit – pasi përshëndeti të pranishmit tha se sot kur para vetës kemi konkursin në arsim të anuluar jashtë çdo procedure ligjore, pas përfundimit të intervistës me shkrim dhe me gojë, ku pritej vetëm shpallja e rezultateve i njëjti anulohet. Në vendimin për anulim nga ana e kryetarit thuhet se ka pasur shkelje nga ana e komisionit, shtrohet pyetja: cilat janë këto shkelje?, a janë marrë masa nga ana e kryetarit për këto shkelje të pretenduara?, a do të ndërrohet komisioni? Sot para vetës kemi edhe anulimin e blerjes së shërbimeve përmes prokurimit, çuditërisht edhe këtu kjo procedurë anulohet pasi që komisioni për vlerësim ka dhënë opinionin e vet dhe ka mbet vetëm shpallja e rezultateve. Pse u anulua kjo procedurë?, apo personat që ju deshën pushtetit nuk i plotësuan kushtet dhe u anulua edhe kjo procedurë në mënyrë të kundërligjshme?. Kryetari i komunës anuloi vendimin e qeverisjes së kaluar që qytetarët të mos paguajnë 80 euro për kyçje individuale? Nuk e keni idenë se ku qëndron realizimi i projektit, madje nuk keni as informata lidhur me këtë projekt! Mbi 7000 kyçje kanë përfunduar deri në fund të vitit 2021, ndërsa sa kyçje individuale kemi prej që e keni marrë ju qeverisjen? Asnjë! Ende nuk keni filluar asgjë! Mbi 90% e qytetarëve kane kryer obligimet e pagesës duke qenë edhe bashkëpunues gjatë realizimit të punimeve në terren e për çka ne jemi falënderues ndaj tyre, mirëpo tash me këtë vendim tuajin a do të ktheni mjetet qytetarëve që kanë paguar apo keni liruar vetëm një pjesë të qytetarëve që ende nuk kanë paguar. Po krijoni ndasi dhe përçarje në mes të qytetarëve! Sot kur jemi pikërisht në mes të vitit është me interes për ne dhe për qytetarët që po na dëgjojnë se cila është shkalla e realizimit të buxhetit?, sa është realizuar apo a do të realizohet deri në fund?, cilat janë projektet që kanë filluar nëse kemi ndonjë të tillë? Pas gjithë kësaj kohe ne nuk po shohim asgjë, dhe me këtë trend të qeverisjes ju siguroj që suficiti i këtij viti do të jetë më i madh sesa suficiti i katër viteve të fundit të qeverisjes së LDK-së. Sa e dobët është kjo qeverisje tregojnë edhe vendimet e sotme për të cilat kërkoni që të votohen për të tretën herë, rishqyrtim të njëpasnjëshëm të pothuajse të gjitha vendimeve që po sillen në kuvend. Kjo mënyrë e veprimit do të ndikojë direkt në vlerësim të performancës së komunës. Jam i bindur se nëse qeverisja komunale do ishte konsultuar me profesionistë që i ka komuna një gjë e tillë nuk do të ndodhte. Të nderuar kolegë asamblistë, të respektuar qytetarë që po na ndiqni drejtpërdrejtë, ka muaj që jemi zhytur në një krizë të madhe ekonomike, rritje astronomike të çmimeve të produkteve esenciale - bukës, vajit, naftës, lëndëve djegëse për ngrohje për sezonin e dimrit, e siç po shihet kriza po shkon vetëm duke

u thelluar e me këtë edhe jeta duke na u vështirësuar. Në këto rrethana, në vend se të gjithë të angazhohemi të jemi në krye të detyrave e përgjegjësive tona e më së shumti kryetari me kabinetin e tij, sepse për këtë është votuar, për të kryer këto punë pati premtuar në fushatë dhe normalisht këtë e presin qytetarët tani prej tij. Por në vend se të jetë në krye të përgjegjësive të veta, e të ballafaqohet me sfida, kryetari si duket ka vendos që mos merakoset. Sot Kryetari ka vendosur që të ik nga përgjegjësia që e ka. Nuk kam si ta quaj ndryshe përveç mungesë e guximit për t'u ballafaquar me realitetin e që po duket të jetë një realitet jo aq i këndshëm për një kryetar komune. Këtë më së miri e dëshmojnë këto dy seancat e fundit, në njërën mungon grupi kuvendar i PDK-së e në tjetrën kryetari i komunës.

Behar Duraku, anëtar i kuvendit – pasi i përshëndeti të pranishmit parashtrori, një kërkesë dhe një pyetje, kërkesa ka të bëjë për Drejtorinë e Inspektimeve lidhur me rrugën “Adnan Shyti” që të dërgon tek palestra sportive, te stacioni i vjetër ku disa qytetarë janë ankuar për atë pjesë që është shumë e ngulfatur nga parkimet e automjeteve dhe një kamioni që është i prishur dhe qëndron me vite në trotuar dhe disa shitës aty, ku kanë bllokuar trotuarin në tërësi dhe si rrjedhojë po pengohet lëvizja e lirë e qytetarëve, dhe për vet qytetin ajo pjesë po paraqet pamje të shëmтуar kur dihet se aty ka aktivitete të ndryshme në palestrën sportive e po ashtu në qendrën rinore që është aty. Pra kërkesa është që si Drejtori e Inspektimeve të dilet në vendin e ngjarjes dhe të shikohet ajo pjesë dhe të lirohet trotuari për lëvizje të lirë të qytetarëve. Ndërsa pyetja tjetër ka të bëjë me drejtorinë e Urbanizimit lidhur me disa rrugë në fshatrat Gllavatin Stroc, Bivolak dhe Beçuk, të cilat kanë qenë projekte dyvjeçare ku vitin e kaluar janë përfunduar me zhavorr dhe për këtë vit ka mbetur vetëm asfalti, mirëpo kanë kaluar 6 muaj të këtij viti dhe nuk ka ende asnjë hap në këtë drejtim, prandaj ju drejtohem juve drejtoreshë e nderuar si ka mbet puna për këto rrugë dhe kur priten të fillojnë? Ju faleminderit!

Leonora Gërguri, anëtare e kuvendit - kërkoj nga Drejtorja e Shëndetësisë të jepën informacione, lidhur me arrestimet e fundit që kanë ndodhur, të zyrtarëve që punojnë në QMF-1, pasi që kjo ngjarje ishte shqetësuese për qytetarët e Komunës së Vushtrisë, dhe po ashtu kërkoj një menaxhim më të mirë nga ana e drejtorisë, pasi që analizat laboratorike që pretendohet se po kryhen në laborator nuk janë duke u kryer me arsyetimin se nuk janë duke punuar pajisjet, apo se nuk ka material dhe kjo bie në përgjegjësinë e Drejtorisë së Shëndetësisë.

Ymer Haradinaj, anëtar i kuvendit – pasi i përshëndeti të pranishmit tha se kryetari i komunës më datë 21.6.2022, ka shfuqizuar vendimin komunal me të cilin ekonomitë familjare ngarkoheshin me taksë komunale prej 80 euro, ndërsa bizneset me 150 euro, për kyçje në rrjetin e ujësjellësit. Vendimi i atëhershëm me numër protokolli 1085/19 i datës 12.9.2019, është përcjell edhe me dy aneks-marrëveshje: e para Marrëveshje mirëkuptimi në mes K.R.U. ujësjellësit <Mitrovica SH.A> dhe Komunës së Vushtrisë, në këtë aneks-marrëveshje ndër të tjera në nenin 1 të kësaj marrëveshjeje thuhet: kyçjet individuale që do të realizohen nga Komuna e Vushtrisë për K.R.U “Ujësjellësi” do të participohen nga qytetaret nga 80 € sipas vendimit të komunës, më tej pika 1.2. K.R.U “Ujësjellësi” SH.A. në Mitrovicë, nuk do të aplikojë ngarkesë ose tarifë për kyçje në bazë të Rregullores të Autoritetit Rregullativ të Ujërave dhe pika 1.3 ekonomitë familjare dhe bizneset që nuk participojnë në këtë projekt të komunës K.R.U “Mitrovica” SH.A. në Mitrovicë, do ta aplikon tarifën e kyçjes në bazë të Rregullores së ARU-së. Andaj nga këto dhe përkufizime tjera ligjore pyetja e tij për kryetarin e komunës është, se kur e ka marrë këtë vendim a është konsultuar dhe a i ka njoftuar me shkrim palët nënshkruese të marrëveshjes nga e cila rrjedhin obligimet e dyanshme, d.m.th. a është njoftuar kryeshefi ekzekutiv dhe kryetarët e këshillave të fshatrave, të cilët kanë kryer një punë të madhe dhe të mundimshme në këtë drejtim. Sa do të jetë kostoja financiare e këtij vendimi dhe kah do të sigurohen këto mjete. Meqenëse Drejtorja e Shërbimeve

Publike ka qenë bartëse e këtij projekti, parashtrori pyetje për drejtorin e kësaj drejtorie: sa fshatra janë kyçur në rrjetin e ujësjellësit, në sa fshatra ka përfunduar në tërësi shtrirja dhe kyçja në rrjetin e ujësjellësit, sa është numri i ekonomive familjare dhe i bizneseve që janë kyçur në rrjetin e ujësjellësit nëpër secilin fshat, sa është numri i ekonomive familjare dhe i bizneseve që kanë participuar në secilin fshat, sa është shuma e mjeteve financiare që janë inkasuar në llogarinë e komunës nga ky projekt. Aktualisht a është duke vazhduar projekti i zgjerimit të rrjetit të ujësjellësit në komunën tonë dhe nëse po në cilat fshatra po punohet, a ka afat kohor kur do të përfundojë ky projekt me rëndësi jetike për qytetarët, sepse edhe sot ku jemi në mesin e vitit në temperatura shumë të larta, ka shumë defekte në furnizim me ujë të pijshëm

Benjamin Shala, drejtor i DSHP-së-paraqiti sqarime lidhur me pyetjet e parashtruara nga anëtarët e kuvendit, duke shtuar se është politikë e kryetarit të komunës që ta heq tarifën për kyçje në rrjetin e ujësjellësit me qëllim të lehtësimit të jetës së qytetarëve.

Ymer Haradinaj, anëtar i kuvendit – tha se në bazë të marrëveshjes së komunës dhe Kompanisë së Ujësjellësit, është përcaktuar se nëse qytetarët dhe bizneset nuk mbulojnë taksën prej 80 € për kyçje, atëherë kompania do të aplikojë një taksë tjetër që do të jetë më e lartë dhe kështu një vendim i tillë popullist i kryetarit të komunës vetëm sa do t'i dëmtonte edhe më tepër interesat e qytetarëve.

Adnan Lahu, anëtar i kuvendit – pyeti anëtarët e komisionit të aksionarëve të N.P.L. “Përparimi” lidhur me vendimin e tyre për shkarkimin e bordit të kësaj ndërmarrjeje, nën arsyetimin se ky i fundit ka dështuar në përmbushjen e detyrave dhe përgjegjësiive ligjore të tyre. Në këtë rast ai pyeti se sa mbledhje i ka mbajtur Komisioni i Aksionarëve të kësaj ndërmarrjeje, dhe njoftoi se është mbledhja e parë dhe në këtë mbledhje ka ndodhur shkarkimi i bordit, dhe në këtë rast ka dyshime se ka shkelje ligjore nga komisioni e jo bordi. Pastaj ai vlerësoi se si ka mundësi që ndërmarrja “Përparimi” të jetë e suksesshme, e në të njëjtën kohë të shkarkohet bordi i saj menaxhues, kjo është në ikontradiktë njëra me tjetrën. Në këtë kontekst shtoi se Komisioni i aksionarëve ka dështuar në ofrimin e raportit vjetor të punës, përderisa bordi e ka bërë një gjë të tillë.

Refik Maloku, anëtar i kuvendit – tha se është për keqardhje funksionimi i qeverisë aktuale komunale, dhe se ajo është qeveria më e dobët që ka udhëhequr ndonjëherë në Vushtrri. Krejt dështimet e kësaj qeverie janë duke u mbuluar me disa vendime populliste, siç është ai për anulimin e konkursit në arsim, anulimi i vendimit për taksën për ujin prej 80 €, mandej kthimi i vendimeve nga niveli qendror siç është ai për bartjen e të hyrave komunale, mandej vendimi për lokacionin e tregut, i cili është kthyer në rishqyrtim për disa herë më radhë. Lidhur me anulimin e konkursit në arsim vlerësoi se kryetari i komunës ka bërë shkelje ligjore dhe për këtë do të përgjigjet penalisht.

Albanez Tahiraj, i autorizuari i Kryetarit të komunës - tha se propozimi për diskutim për konkursin në arsim mos të ezaurohet, pasi është propozuar të futet në rend të ditës. Më tej njoftoi se kryetari i komunës është në një vizitë zyrtare në Francë me ftesë të ambasadës së kësaj të fundit ku po marrin pjesë disa komuna të Republikës së Kosovës. Lidhur me konkursin asgjë nuk ka se çfarë të fshehet, sepse kryetari i komunës është me qytetarin dhe ajo po shihet për çdo ditë. Lidhur me shkarkimin e bordit të N.P.L “Përparimi” shtoi dhe njoftoi se Komisioni i aksionarëve ka marrë vendimin meritator, për të cilin tani nuk dëshiron që të interferojë, për faktin se vendimi ka këshillën juridike për ankesë dhe për mundësinë e hapjes së konfliktit administrativ.

Ilmi Azemi, anëtar i kuvendit – tha se bordi i kaluar i ndërmarrjes “Përparimi”, ka qenë bord politik, dhe këtë përbërje edhe përkundër respektit ai e kishte kundërshtuar. Ai tha se ndryshimi dhe marrja e pushtetit nënkupton marrjen edhe të përgjegjësiive. Ky shkarkim që ka ndodhur është dashur të bëhet edhe më herët sepse nuk mund të qeverisësh me njerëzit që nuk ke bashkëpunim.

Më tej shtoi dhe konsideroi se bordi aktual i kësaj ndërmarrjeje ka dështuar në përmbushjen e detyrave dhe obligimeve ligjore.

Adnan Lahu, anëtar i kuvendit – tha se bordi aktual i shkarkuar i ndërmarrjes “Përparimi” nuk është bord politik por profesional, dhe se këtë do ta dëshmojë koha, pasi që i njëjti do të kthehet prapë me anë të ankesës pasi që kemi shkelje ligjore.

Agim Bregaj, anëtar i kuvendit – tha se kjo ndërmarrje është e suksesshme dhe se komisioni i aksionarëve ka mbajtur vetëm një mbledhje dhe në fund është befasuar kur është marrë vendimi për shkarkimin e bordit, vendim për të cilin ai ka qenë kundër.

Albanez Tahiraj, i autorizuari i Kryetarit të komunës - kërkoi nga parafolësi i tij të jetë më serioz, dhe ta thotë të vërtetën pasi që tema është serioze. Ai më tej shtoi se nuk ka qenë mbledhja e parë e komisionit atëherë kur ka ndodhur shkarkimi i bordit dhe kjo konstatohet nga procesverbali i mbledhjes paraprake, për të cilën kishte votuar edhe përfaqësuesi i LDK-së. Pastaj shtoi se mes komisionit dhe bordit të ndërmarrjes kishte pasur komunikim zyrtar përmes shkresave, i njëjti nuk ka ofruar materialet e kërkuara që dëshmon se ky bord nuk i ka përmbushur obligimet që dalin nga ligji. Në këtë kontekst shtoi se nuk dëshiron të interferojë në këtë proces pasi që ekziston e drejta e ankesës, dhe pas përfundimit të këtij procesi gjithçka që ka ndodhur do të informohet kuvendi.

Agim Bregaj, anëtar i kuvendit – njoftoi se në Komisionin e aksionarëve kishte pyetur kryesuesin e komisionit se a kanë dërguar bordi ndonjë raport, plan ekonomik dhe se a kanë kryer obligimet sipas ligjit, dhe përgjigjja ka qenë negative se asgjë nuk është punuar, andaj ai kishte vlerësuar se nëse është kështu situata, atëherë duhet urgjentisht të shkarkohet bordi i N.P.L “Përparimi”.

Sylejman Mehulli, anëtar i kuvendit – tha se nuk i takon të autorizuarit të kryetarit të komunës që t’ju ndërhyjë anëtarëve të kuvendit duke ju dhënë leksione, dhe shtoi se edhe në mbledhjen e KPF-së kishte kërkuar nga DSHP-ja dhe DUMM-ja që ta sjellin listën e rrugëve që do të ndërtohen këtë vit, ashtu siç ka qenë premtimi i kryetarit të komunës.

Agron Përçuku, anëtar i kuvendit – kërkoi nga kryesuesja e kuvendit që të respektohet rregullorja e punës, dhe të futemi në diskutime për rendin e ditës dhe jo të zgjatemi në diskutimet shterpe e të padobishme.

Bekim Zabërgja, anëtar i kuvendit – pasi i përshëndeti të pranishmit, shtoi se po diskuton në mënyrë të përsëritur për çështjen e nevojës të sjelljes në kuvend të Propozim-vendimit për shfuqizimin e vendimit me numër protokollit 81/21 për zonën ekonomike në fshatin Lumadh. Në mbledhjen e kaluar pasi që i ishte ndërprerë fjala kryesuesja e kuvendit kishte premtuar se kjo çështje do të dërgohet në kuvend këtë mbledhje, por prapë e shohim se nuk është sjellë në rend dite. Çështja e zonës ekonomike është aseti më i madh i qytetarëve, nëse e marrim nga aspekti zhvillimor-ekonomik në rend dite nuk është proceduar alfa dhe omega (A-Ω) e zhvillimit ekonomik të komunës. Duke u bazuar në nenin 18 të Rregullores të punës së kuvendit, e drejta e anëtarit të kuvendit për të propozuar pikë të rendit të ditës të drejtë të cilën ai nuk e ka shfrytëzuar, me qëllimin më të mirë që të respektohen në tërësi procedurat ligjore të procedimit të kësaj çështjeje në kuvend, duke kaluar dhe shqyrtuar fillimisht në Komitetin për Politikë dhe Financa. Në fund duke ju referuar diskutimit të shefit të grupit kuvendar të LDK-së z.Adnan Lahut, vlerësoi se ai foli për zhvillim ekonomik, ndërsa ai ka zbatuar një vendim të zonës ekonomike, i cili është i dëmshëm për komunën dhe qytetarët e Vushtrrisë, këtë gjë e ka konstatuar MAPL dhe Agjencia Kundër Korrupsionit, e cila ka kërkuar që ky vendim të shfuqizohet dhe e njëjta të njoftohet për hapa që ka ndërmarr Kuvendi i Komunës së Vushtrrisë. Andaj kërkoi nga kryesuesja e kuvendit që këtë pikë ta sjellë në kuvend në mbledhjen e radhës, në të kundërtën ai do t’i përdorë format

tjera ligjore, duke e propozuar vetë këtë pikë në rend dite për shqyrtim dhe shfuqizimin e këtij vendimi.

Fatmire Cecelia, anëtare e kuvendit- ngrit shqetësimin e qytetarëve që tani në këto ditë të nxehta vere, për 4 ditë rresht ka pasur pengesa në furnizim me ujë të pijshëm, andaj ju bëri thirrje institucioneve lokale, të ndërmarrin veprime të shpejta. Pastaj ceku çështjen e ndarjes së subvencioneve për OJQ-të, ku kemi shumë ankesa për ndarjen e tyre dhe ndërhyrjes nga ekzekutivi. Në këtë kontekst pyeti për disa organizata që janë përfituese të subvencioneve dhe këto organizata janë të panjohura për qytetarët dhe për shoqërinë civile, por edhe për vetë atë si ish-drejtoreshë. OJQ-të në fjalë janë: <Creative center>, <Art natyra>, <EVDS>, <SBZHD>, <STR>, <ORGA>, < Vicina vizion>, <Rinia aktive e Vushtrisë>, <Qendra për rini të avancuar>, <Koha në duart tona>. Lidhur me këtë pyeti drejtoreshën e kulturës se a janë këto organizata të Komunës së Vushtrisë, dhe se këto organizata a e kanë një vit nga data e regjistrimit në ministrinë kompetente, siç kërkohet me Rregulloren e Ministrisë së Financave.

Nexhmedin Rashica, drejtor i DSHPS - paraqiti sqarime për pyetjen e anëtares së kuvendit, ku njoftoi se ka pasur arrestime të zyrtarëve të laboratorit të QKMF-së dhe për këtë janë informuar më datë 15.6.2022. Nga informata zyrtare del se për një kohë të gjatë ka pasur hetim të laboratorit dhe zyrtarëve kompetent sa i përket analizës me urinë. Si Drejtori e Shëndetësisë, kanë ndërmarrë veprim, duke i suspenduar këta tre zyrtarë për një periudhë prej gjashtëmuajsh deri në një vendim të plotfuqishëm të organeve të drejtësisë. Pastaj vlerësoi se nuk mund të jap përgjigje për fajësinë dhe pafajësinë e tyre sepse është punë e organeve gjyqësore, ndërsa zëvendësimi i këtyre zyrtarëve është bërë. Sa i përket analizave laboratorike, material për analiza ka në sasi të mjaftueshme, ndonjëherë ka probleme me realizimin e analizave për shkak të mosfunksionimit të pajisjeve laboratorike dhe kjo varet nga kompania për sërvisimin e këtyre pajisjeve.

Fortuna Krasniqi, drejtoreshë e DUMM-së - njoftoi se Drejtorja e Urbanizmit në bashkëpunim me Drejtorinë e Shërbimeve Publike kanë themeluar një komision të përbashkët për vlerësimin e gjendjes së rrugëve në Komunën e Vushtrisë, dhe për këtë është duke u bërë priorizimi i nevojave për ndërtimin e rrugëve.

Adnan Lahu, anëtar i kuvendit –propozoi që në propozim-vendimin për lirimin nga pagesa e taksës për shfrytëzimin e hapësirave publike, t'i shtohet edhe hapësirave publike që janë me qira, përndryshe ky është një propozim-vendim mjaft i qëlluar duke marrë për bazë krizën ekonomike.

Në vazhdim, kuvendi në mënyrë të veçantë i votoi pikat e dërguara në të ndryshme,

Pas votimit me vota “unanime” u futen në rend të ditës pika 10 dhe 11.

Në rend të ditës u shtua edhe pika 12, Rishqyrtimi i vendimit nr.100/22, i datës 28.4.2022 për caktimin e lokacionit për ndërtimin e tregut të gjelbër për prodhime vendore në Vushtri, me 21 vota “për”, 4 vota “kundër”, të tjerat abstenim.

Kuvendi pas votimit me 11 vota “për”, 12 vota “kundër”, të tjerat abstenim nuk e aprovoi për inkorporim në rendin e ditës propozimin për diskutim lidhur me anulimin e konkursit në arsim.

Në fund të debatit jashtë rendit të ditës dhe për rendin e ditës, kuvendi pas votimit me 23 vota “për” 6 vota “kundër” të tjerat abstenim aprovoi këtë:

REND DITE

1. Shqyrtimi dhe aprovimi i procesverbalit nga mbledhja e rregullt e Kuvendit të Komunës së Vushtrrisë, mbajtur më datë 26 maj 2022;
2. Shqyrtimi i Raportit të sistemit të menaxhimit të performancës dhe grantit të performancës për vitin 2020;
3. Shqyrtimi i Draft-Kornizës Afatmesme (KAB) për vitet 2023-2025;
4. Shqyrtimi i Draft – Rregullores për Ndryshimin dhe Plotësimin e Rregullores (KKV) nr.03/2020 për Përkrahjen e Fermerëve në Bujqësi dhe Bizneseve në Sektorin Privat;
5. Shqyrtimi i Informatës për ndarjen e bursave dhe shpërblimet e nxënësve për vitin 2020/2021;
6. Shqyrtimi i Informatës rreth procedurës së legalizimit të ndërtimeve pa leje;
7. Shqyrtimi i Informatës për punën e Drejtorisë për Administratë, gjatë periudhës janar – qershor 2022;
8. Rishqyrtimi i vendimit nr. 95/22 i datës 28.4.2022 për shpërndarjen e të hyrave vetanake të tejkaluara për buxhetin e vitit 2021;
9. Rishqyrtimi i vendimit nr. 96/22 i datës 28.4.2022 për bartjen e të hyrave vetanake nga viti 2021 në vitin 2022;
10. Shqyrtimi i Propozim-vendimit për lirim nga pagesa e taksës për shfrytëzimin e hapësirave publike;
11. Shqyrtimi i Draft – Rregullores për Organizimin, Funkcionimin dhe Bashkëpunimin e Komunës me Fshatrat, Vendbanimet dhe Lagjet Urbane;
12. Rishqyrtimi i vendimit nr.100/22 i datës 28.4.2022 për caktimin e lokacionit për ndërtimin e tregut të gjelbër për prodhime vendore në Vushtri;
13. Të ndryshme.

1. Shqyrtimi dhe aprovimi i procesverbalit nga mbledhja e rregullt e Kuvendit të Komunës së Vushtrrisë, mbajtur më datë 26 maj 2022

Pas shqyrtimit të kësaj pike të rendit të ditës, Kuvendi me vota “unanime” aprovoi procesverbalin nga mbledhja rregullt e Kuvendit të Komunës së Vushtrrisë, mbajtur më datë 26 maj 2022.

2. Shqyrtimi i Raportit të sistemit të menaxhimit të performancës dhe grantit të performancës për vitin 2020

Islam Latifi, zyrtar i DSHP-së - tha se Ministria e Administrimit të Pushtetit Lokal (MAPL), në bashkëpunim me komunat dhe donatorët, kanë përmbyllur procesin e vlerësimit për Sistemin e Menaxhimit të Performancës dhe Grantit të Performancës, sipas performancës së komunave dhe kanë publikuar raportin për vitin 2020. Ky raport përmban sistemin i cili ka 19 fusha dhe 119 tregues dhe Grantin e Performancës i cili bazohet në 28 tregues, ndërsa Komunën e Vushtrrisë e ka renditur në pozitën e 10, me një përqindje mesatare 50.00%. Raportimi i të dhënave dhe vlerësimi i tyre për herë të parë u realizua përmes Sistemit Elektronik të Menaxhimit të Performancës Komunale. Në këtë sistem kishin qasje të gjithë zyrtarët raportues të komunave, koordinatorët e performancës, kryetarët e komunave dhe zyrtarët vlerësues të ministrisë. Krahas raportimit, sistemi ofroi mundësinë e bashkëngjitjes së dokumenteve referuese për të dhënat e raportuara, me qëllim të dokumentimit të të dhënave, si dhe një proces komunikimi në mes të komunave dhe Ministrisë, duke lënë gjurmë në secilën fazë të vlerësimit të të dhënave. Të dhënat

e ofruara shërbejnë për të parë trendet e zhvillimit të komunave nga viti në vit, në mënyrë që prioritetet vijuese të shtrihen në mbështetje të sektorëve më pak të organizuar. Veç kësaj, rezultatet e raportit shërbejnë si mjet vetëkontrolli për punën e administratës komunale, për të rritur kapacitetet dhe për të reflektuar në përgjegjshmërinë e zyrtarëve publik. Për më tepër, raporti informon qytetarët për pritjet e arsyeshme të ofrimit të shërbimeve nga institucionet dhe të zgjedhurit e tyre lokal. Raporti nxjerrë përfundimet e përgjithshme për shkallën e të arriturave të komunave dhe jep rekomandimet përkatëse për përmirësimin e shërbimeve në bazë të rregullave juridike në fuqi apo standardeve të kërkuara qeverisëse. Komuna e Vushtrisë nuk është kualifikuar për grant të performancës për shkak të mospërbushjes të të gjitha kritereve minimale të përcaktuara në Rregullat e Grantit për Performancë. Një prej kritereve që nuk është plotësuar, është shkalla e ulët e shpenzimit të buxhetit të investimet kapitale, e cila nuk e arrin vlerën apo kriterin e përcaktuar prej 75%. Shkalla e shpenzimit të buxhetit të investimet kapitale për Komunën e Vushtrisë për vitin 2020 është vlerësuar 74%. Pra raporti që e keni para jush përveç përshkrimit të qëllimit të këtij sistemi, përmban në vete edhe informatat për trendet e performancës të Komunës së Vushtrisë ndër vite, konkluzione për arritjet më të larta dhe më të ulëta, si dhe rekomandimet se ku duhet të kemi përkushtim më të madh për rritjen e performancës në ofrimin e shërbimeve ndaj qytetarëve. Në bazë të analizave të përgjithshme dhe specifike, si dhe gjetjeve nga ky hulumtim, Komunës së Vushtrisë i rekomandohet që të punojë me përkushtim më të madh në këto aspekte:

- Sa më shumë përfshirje të të punësuarve me aftësi të kufizuara si dhe sipas përkatësisë gjinore, në institucionet komunale;
- Rritjen e sipërfaqeve të shesheve publike dhe hapësirave të gjelbra në m² për kokë banori;
- Rritja e % së vendbanimeve për furnizim me ujë të pijshëm;
- Ligjshmëria e kontratave për shërbime të veçanta;
- Rritjen e % të vendbanimeve me trajtim të ujërave të zeza;
- Rregullimi i numrit të popullatës e cila përfiton nga skema sociale;
- Hartimi i Planit Lokal për Veprim në Mjedis;
- Raportimi i planit vjetor të Planit të integritetit para kuvendit komunal;
- Diskutimi në kuvend i Raportit të auditorit të brendshëm;
- Përbushja e standardeve minimale të konsultimeve publike, si dëgjimet për KAB dhe buxhet komunal;
- Miratimi me kohë i buxhetit vjetor;
- Niveli i adresimit të rekomandimeve të Zyrës Kombëtare të Auditorit;
- Përgatitja dhe publikimi i listës së pronave komunale të planifikuara për dhënie në shfrytëzim;
- Sipërfaqja e territorit të komunës, e mbuluar me plane rregulluese (të hollësishme);
- Konstituimi i Këshillave të vendbanimeve-fshatrave.

Pas shqyrtimit të kësaj pike të rendit të ditës, kuvendi pas votimit me 16 vota “për” të tjerat “abstenim”, aprovoi raportin e sistemit të menaxhimit të performancës dhe grantit të performancës për vitin 2020.

3. Shqyrtimi i Draft-Kornizës Afatmesme (KAB) për vitet 2023-2025

Ymer Haradinaj, anëtar i kuvendit – tha se KAB-i për vitet 2023-2025, paraqet dokumentin bazë, për planifikimin e buxhetit për vitet vijuese dhe është dokument strategjik ekonomik që ngërthen në vete totalin e mjeteve financiare në dispozicion të komunës, planifikimin ekonomik, projektet kapitale dhe prioritet e nevojat e komunës. Asgjë të re dhe kreative të përcaktuar në objektiva nuk ka në këtë dokument. Fillimisht Ministria e Financave ka përcaktuar disa objektiva e që dihet që ky dokument është hartuar në bazë të atyre objektivave, por që nuk janë cekur qartë dhe konkretisht këto objektiva nga komuna jonë. Po ashtu ky dokument duhet të ofrojë kornizë gjithëpërfshirëse, reale, planifikim të investimeve kapitale, shpenzime të qarta, pra me fjalë tjera duhet të ofrojë një disiplinë financiare. Për tatimin në pronë, si një komponentë mjaft e rëndësishme e komunës, parashtrori disa pyetje: cilat janë masat që do të përdoren që përqindja e inkasimit të tatimit të rritet, a ka borxhe nga vitet e kaluara, dhe cila është forma që do të veprojnë në rritjen e këtij inkasimi, e cila nuk është specifikuar në këtë dokument. Në faqen 9 të këtij dokumenti thuhet se organizatat buxhetore, pas një analize paraprake duhet të parashikojnë shpenzimet e shpronësimit për çdo objekt individual, në kuadër të kostos totale të projektit, por në qarkoren e parë buxhetore dhe në planifikim asnjëherë vit pas viti nuk kemi një projeksion për borxhet e mundshme të padive për detyrimet kontraktuale nga kontrata kolektive e që nga viti 2020 kemi paguar dhe do të paguajmë edhe në të ardhmen dhe theksohet se Komuna e Vushtrrisë iu ka borxh mësimdhënësve në disa shuma të caktuara, por duhet të jemi të qartë dhe ta dimë se këto shuma nuk janë në llogari vjetore sepse variojnë në çdo vit në çdo muaj, por edhe çdo ditë. Në faqen 21 të KAB-it thuhet se gjatë kësaj periudhe pritet implementimi i projekteve kapitale bazuar në një listë prioritetesh të projekteve me ndikim përmirësimit e rrjetit të transportit dhe përmirësimit e rrjetit të energjisë elektrike, për këtë pyeti se cilat janë këto projekte që përmirësojnë transportin dhe rikujtojnë se rrejtji i energjisë elektrike nuk është kompetencë e komunës edhe pse ky rrjet pothuaj në thuaj shumicën e fshatrave është i vjetruar dhe paraqet rrezik për qytetarët tanë. Në këtë kontekst pyeti se cilat janë masat që do të ndërmerren në bashkëpunim me KEDS-in për përmasimin e rrjetit të vjetruar të energjisë elektrike.

Ilmi Azemi, anëtar i kuvendit – tha se kjo kornizë duhet të korrigjohet në faqen 7, paragrafi i fundit, ku është përshkruar gjendja, respektivisht aktivizimi i zonës ekonomike në fshatin Lumadh, sepse në këtë rast hartuesi i referohet kësaj zone sikur ajo të mos ishte ndërtuar fare, e që në të vërtetë korrigjimi duhet të jetë me sa vijon: Komuna e Vushtrrisë në bashkëpunim me ministrinë e linjës ka ndërtuar zonën ekonomike-Parkun Industrial në Lumadh, në sipërfaqe prej afërsisht 40 hektarë. Sepse në tekst thuhet se komuna, përkatësisht Drejtoria për Zhvillim Ekonomik, mund të fillojë procedurat për ngritjen e kapaciteteve teknike për tërheqjen e investitorëve në këtë zonë ekonomike dhe se edhe kjo preambulë duhet të ndryshohet për faktin se gjendja aktuale e zonës duhet të përshkruhet ashtu çfarë është në realitet. Pastaj thuhet se është shumë e nevojshme që të konsultohen bizneset ekzistuese për nevojat dhe kapacitetet e tyre, edhe kjo frazë duhet të hiqet nga teksti, për shkakun se ka përfunduar procesi i dhënies së pronës në shfrytëzim dhe kjo duhet të trajtohet sipas gjendjes faktike, pavarësisht verdikteve të ardhshme. Në fund njoftoi se pranimi teknik i kësaj zone ekonomike është bërë dhe se tani komuna duhet të intensifikojë përpjekjet për të ndodhur sa më shpejt investimet në atë zonë.

Sylejman Mehulli, anëtar i kuvendit – tha se kur bëhet fjalë për KAB-in, si dokument strategjik komunal, atëherë duhet ndalur tek vizioni i qeverisjes nëse ai vizon ekziston apo nëse ai mbahet ashtu siç është pretenduar, e që fatkeqësisht ai nuk është i vërtetë. Në faqen 36 të këtij dokumenti në mes tjera thuhet: - vizioni për arsimin, po ashtu marrin pjesë në përzgjedhjen e stafit dhe drejtorëve të shkollave për të siguruar që profesionistët dhe të kualifikuarit janë të punësuar për të mësuar qytetarët tanë të rinj dhe njëherazi i mbajmë shënimet e nevojshme komunale të arsimit dhe statistikave për të matur nivelin e cilësisë së arsimit që ofrohet nga komuna. Gjithashtu komunikojmë hapur me publikun për të gjitha çështjet që lidhen me politikën e arsimit dhe të procesit përbrenda komunës. Andaj vlerësoi se kjo është qasje e kësaj qeverie se si paraqitet vizioni në letër dhe fushatë politike, ndërsa e vërteta është se kjo qeveri nuk e ka guximin që të diskutojë për politikën e arsimit, për procedurat e rekrutimit, duke i ikur debatit dhe duke ju shmangur përgjegjësisë. Andaj i bëri thirrje qeverisë komunal të përputhë vizionin e saj në letër me vizionin partiak dhe qeverisës, dhe të komunikojë me publikun dhe kuvendart për politikën e arsimit dhe jo të shmanget. Pastaj tek vizioni për shëndetësinë ndër të tjera thuhet: - kemi një vizion interesant ku thuhet se ofrojmë edhe kujdesin shëndetësor emergjent, ndërsa kujdesi emergjent ofrohet nga niveli sekondar shëndetësor, por kjo si duket është një inovacion, dhe nëse kjo është arritur nga Drejtoria e Shëndetësisë, atëherë e përgëzon drejtorin e kësaj drejtorie, por kjo dihet se nuk mund të arrihet sepse kjo çështje është e rregulluar me ligj. Në faqe 33 ndër të tjera thuhet se: përveç kësaj, ne po ashtu do të punojmë për të siguruar nivelet e duhura të higjienës që nga kryerja e inspektimeve sanitare për ujin e pijshëm, bizneset prodhuese, përpunimin ose shitjen e ushqimit dhe atyre kompanive që merren me trajtimin e mbeturinave. Ky vizion nuk përshtatet me kompetencat, pasi që Drejtoria e Shëndetësisë nuk i kryen këto shërbime. Tek projektet kapitale në shëndetësi siç është hapja e puseve në QMF dhe AMF, shtoi se komuna është zotuar se do të shtrijë ujësjellësin në çdo lokacion, atëherë cila është arsyeja e hapjes së këtyre puseve, dhe po ashtu kërkoi të di se në cilat QMF dhe AMF do të hapen këto puse të ujit. Zyrat administrative në QKMF, për çfarë qëllim do të funksionojnë këto zyra, vetëm nëse shfrytëzohen për lëshimin e certifikatave.

Ymer Haradinaj, anëtar i kuvendit – duke u përgjigjur në diskutimin e anëtarit të kuvendit z. Ilmi Azemi, shtoi se ai paraqiti një rezumë sikur parku industrial ka kaluar të gjitha fazat e aprovimit, por siç dihet deklarimi i kryetarit të komunës dhe qeverisjes komunale është se ky projekt është kthyer në pikën zero. Andaj grupi kuvendar i LVV-së e përkrah këtë dokument ashtu siç është procedura, pa korrigjimet e propozuara nga anëtari i kuvendit z. Ilmi Azemi.

Ilmi Azemi, anëtar i kuvendit – tha se diskutimi i kolegut të tij parafolës është për keqardhje, pasi që ai e di mirë se zona ekonomike është ndërtuar dhe është në fazën finale, dhe në KAB përshkruhet sikur ky projekt fare nuk ka filluar. Andaj propozimi i tij ishte që ky dokument të korrigjohet sa i përket të dhënave që janë shpërfaqur që nuk janë të sakta dhe jo të faktuara.

Ymer Haradinaj, anëtar i kuvendit – tha se e kupton se ky projekt në aspektin fizik të fjalës është përfunduar, por sa i përket përzgjedhjes së përfituesve ka pasur konflikt interesi, dhe për anëtarin e kuvendit Ilmi Azemi kjo është e dhimbshme sepse i njëjti ka interes personal.

Bekim Zabërgja, anëtar i kuvendit – tha se në aspektin fizik parku industrial është ndërtuar, ndërsa akoma nuk ka përfunduar në aspektin teknik e ligjor.

Remzi Ahmeti, drejtor i DBF-së - paraqiti sqarime të përgjithshme lidhur me KAB-in, duke shpalosur vizionin e zhvillimit ekonomik të Komunës së Vushtrrisë për periudhën 2023-2025. Po ashtu njoftoi për masat që i ka ndër marrë Drejtoria e Financave për rritjen e inksimit të tatimit në pronë.

Abit Abiti, ZKF - paraqiti sqarime lidhur me vizonin dhe politikat ekonomike komunale, si dhe për objektivat strategjike që duhet të inkorporohen në buxhetin e komunës për vitin 2023 e që ndikojnë në zhvillimin ekonomik të Komunës së Vushtrrisë. Po ashtu ai dha sqarime sa i përket çështjeve të ngritura nga anëtarët e kuvendit. Lidhur me projektin zona ekonomike në Lumadh, kërkoi të ketë votim të veçantë, pasi pati kërkesa për korrigjim të përkufizimit tekstual të dokumentit, sa i përket këtij projekti.

Në fund të debatit lidhur me këtë pikë të rendit të ditës, kuvendi pas votimit me 17 vota “për”, 12 vota “kundër” vendosi me sa vijon:

1. Me këtë vendim aprovohet Korniza Afatmesme Buxhetore 2023-2025 e Komunës së Vushtrrisë, konform Qarkores Buxhetore 2023/01, e lëshuar nga Ministria e Financave, Punës dhe Transfereve, me të cilën caktohen kufijtë buxhetor të buxhetit të Komunës së Vushtrrisë për vitin 2023-2025.

2. Pjesë përbërëse e këtij vendimi është dokumenti me emërtimin Korniza Afatmesme Buxhetore 2023-2025 e Komunës së Vushtrrisë.

3. Për zbatimin e këtij vendimi obligohet: Drejtoria për Buxhet dhe Financa.

4. Ky vendim hynë në fuqi në ditën e aprovimit dhe nënshkrimit nga Kryesuesja e Kuvendit.

4. Shqyrtimi i Draft – Rregullores për Ndryshimin dhe Plotësimin e Rregullores (KKV) nr.03/2020 për Përkrahjen e Fermerëve në Bujqësi dhe Bizneseve në Sektorin Privat

Pas shqyrtimit të kësaj pike të rendit të ditës, kuvendi pas votimit me vota “unanime” aprovoi Rregulloren për Ndryshimin dhe Plotësimin e Rregullores (KKV) nr.03/2020 për Përkrahjen e Fermerëve në Bujqësi dhe Bizneseve në Sektorin Privat.

5. Shqyrtimi i Informatës për ndarjen e bursave dhe shpërblimet e nxënësve për vitin 2020/2021

6. Shqyrtimi i Informatës rreth procedurës së legalizimit të ndërtimeve pa leje

7. Shqyrtimi i Informatës për punën e Drejtorisë për Administratë, gjatë periudhës janar – qershor 2022

8. Rishqyrtimi i vendimit nr. 95/22 i datës 28.4.2022 për shpërndarjen e të hyrave vetanake të tejkaluara për buxhetin e vitit 2021;

Pas shqyrtimit të kësaj pike të rendit të ditës, kuvendi pas votimit me 19 vota “për”, tjerat “abstenim” vendosi me sa vijon:

1. Me këtë vendim bëhet shpërndarja e tejkalimit të planit të të hyrave vetanake për vitin 2021 në kategoritë ekonomike të cekura si më poshtë:

- Mallra dhe shërbime306,354.13 €
- Shpenzime komunale.....9,994.73 €

- Subvencione dhe transfere.....593,966.26 €
- Investime kapitale.....227,973.92 €

Totali i mjeteve të tejkaluara.....1,138,289.04 €

2. Për zbatimin e këtij vendimi obligohet: Drejtoria për Buxhet dhe Financa dhe drejtoritë tjera kompetente komunale.

3. Pjesë përbërëse e këtij vendimi janë tabela për shpenzimet operacionale dhe tabela e shpenzimeve kapitale.

4. Me hyrjen në fuqi të këtij vendimi shfuqizohet vendimi i Kuvendit të Komunës së Vushtrrisë me numër të protokollit Nr.95/22 i datës 28.4.2022.

5. Ky vendim hynë në fuqi pesëmbëdhjetë (15) ditë pas protokollimit në Ministrinë e Administrimit të Pushtetit Lokal, si dhe shtatë (7) ditë pas publikimit në faqen zyrtare të Komunës së Vushtrrisë.

9. Rishqyrtimi i vendimit nr. 96/22 i datës 28.4.2022 për bartjen e të hyrave vetanake nga viti 2021 në vitin 2022

Pas shqyrtimit të kësaj pike të rendit të ditës, kuvendi pas votimit me 14 vota “për”, 1 votë “abstenim” vendosi me sa vijon:

1. Me këtë vendim bëhet bartja e të hyrave vetanake nga viti 2021 në vitin 2022 në kategoritë si në vijim:

- Mallra dhe shërbime675,131.31 €
- Shpenzime komunale.....14,504.93 €
- Subvencione dhe transfere.....693,700.00 €
- Investime kapitale.....1,190,675.47€

Totali i mjeteve të bartura.....2,574,011.71 €

2. Për zbatimin e këtij vendimi obligohen: Drejtoria për Buxhet dhe Financa dhe drejtoritë tjera kompetente komunale.

3. Pjesë përbërëse e këtij vendimi janë tabela për shpenzimet operacionale dhe tabela e shpenzimeve kapitale.

4. Me hyrjen në fuqi të këtij vendimi shfuqizohet vendimi i Kuvendit të Komunës së Vushtrrisë me numër të protokollit Nr.96/22 i datës 28.4.2022.

5. Ky vendim hynë në fuqi pesëmbëdhjetë (15) ditë pas protokollimit në Ministrinë e Administrimit të Pushtetit Lokal, si dhe shtatë (7) ditë pas publikimit në faqen zyrtare të Komunës së Vushtrrisë.

10. Shqyrtimi i Propozim-vendimit për lirimin nga pagesa e taksës për shfrytëzimin e hapësirave publike

Pas shqyrtimit të kësaj pike të rendit të ditës, kuvendi pas votimit me vota “unanime” vendosi me sa vijon:

1. Me këtë vendim lirohen nga pagesa e taksës komunale, shfrytëzimi i hapësirave publike para lokaleve, të cilat ushtrojnë veprimtarinë e gastronomisë për më pak se një vit, nga data 3.1.2022 deri më datën 28.12.2022.

2. Qëllimi i këtij vendimi është përkrahja e këtyre veprimtarive, të cilat operojnë në gjendje jo të mirë ekonomike.

3. Për zbatimin e këtij vendimi obligohen: Drejtoria për Buxhet dhe Financa, Drejtoria për Urbanizëm dhe Mbrojtje të Mjedisit, si dhe Drejtoria për Inspektive.

4. Ky vendim hynë në fuqi shtatë (7) ditë pas publikimit në faqen zyrtare të Komunës së Vushtrrisë.

11. Shqyrtimi i Draft – Rregullores për Organizimin, Funkcionimin dhe Bashkëpunimin e Komunës me Fshatrat, Vendbanimet dhe Lagjet Urbane

Ismet Gashi, udhëheqës i zyrës ligjore - paraqiti sqarime lidhur, lidhur me këtë draft-rregullore, duke shtuar se emërtimi dhe përkufizimi territorial i lagjeve urbane duhet të bëhet me vendim të veçantë të kuvendit sipas dispozitave të statutit të komunës.

Pas shqyrtimit të kësaj pike të rendit të ditës, kuvendi me vota “unanime” fillimisht aprovoi vendimin për përkufizimin dhe emërtimin e lagjeve urbane:

1. Me këtë vendim bëhet përkufizimi dhe emërtimi i lagjeve urbane të qytetit të Vushtrrisë si në vijim:

1.1. “Lagjja Qendra”;

1.2. “Lagjja Kalaja”;

1.3. “Lagjja Ura e Vjetër e Gurit”;

1.4. “Lagjja Vicianë”;

1.5. “Lagjja Silnica”;

1.6. “Lagjja Dardania”, dhe

1.7. “Lagjja Iliria”.

2. *Lagjja Qendra* kufizohet me rrugët: “Faruk Beqiri”, “Enver Musa”, “Zenullah Begu”, segmenti i rrugës “Vesli Klark”, “Hasan Prishtina” dhe sheshin “Adem Jashari”, kurse në kuadër të lagjes përfshihen këto rrugë: “Shefki Dallku”, “Hys Popova”, “Burim Muli”, “Arsim Muzaqi”, “Sulejman Vokshi”, “7 Shtatori”, “Muharrem Berisha”, “Ahmet Selaci”, “Jakup Badivuku”,

“Galip Badivuku”, “Shemsi Istrefi”, “Rexhep Tërllobuqi”, “Aziz Zhilivoda”, “Rrahmon Selaci”, “Isa Boletini”, “Faruk Sunguri”, “Bislim Bajgora” dhe rruga “Basri Beqiri”.

3. *Lagjja Kalaja* kufizohet me rrugët: “Xhavit Mulaku”, “Dëshmorët e Kombit”, sheshin “Adem Jashari”, rruga “Hasan Prishtina”, “Gjergj Kastrioti Skënderbeu”, “Ana Lin” dhe “Rrustem Hyseni Historiani”, kurse në kuadër të lagjes përfshihen këto rrugë: “Ekrem Mulaku”, “Murat Rashica”, “Gjon Buzuku”, “Bedri e Nebih Uka”, “Burhan Badivuku”, “Bedri Bajgora”, “Hamdi Ferati”, “Ukshin Kovaçica”, “Ismajl Parduzi”, “Shahin Krasniqi”, “Rexhep Musa”, “Kruja”, “Ali Pashë Tepelena”, “Ridvan Qazimi”, “Marin Berleti”, “Pandeli Sotiri”, “Udha e Shkronjave”, “Hoxhë Kadri Prishtina”, “Shem Nallbani”, “Gëzim Rama”, “Xhevat Jusufi”, “Sali Zeka”, “Ismajl Qemajli”, “Halit Çuka”, “Zeqir Kamerolli”, “Ramadan Fazliu”, “18 Prilli”, “Ferat Novolani”, “Luan Haradinaj”, “Arsim Rrustolli”, “Haxhi Zeka”, “Ali Buqinca”, “Çameria”, “Enver Rustolli”, “17 Qershori”, “Jeronim De Rada”, “Nazmi Ispahiu”, “Qamil Zeqiri”, “Shefqet e Shefki Popova”, “Hakif Zejnullahu”, “Avni Rrustemi”, “Jakup Ceraja”, “Aziz Mehmeti”, “Mursel Bllata”, “Hajzer Jashari”, “Edmond Hoxha”, “Shemsi Ahmeti”, “Bahri Ferizi”, “Naser Hajrizi” dhe rruga “2 Korriku”.

4. *Lagjja Ura e Vjetër e Gurit* kufizohet me rrugët: “Gjergj Kastrioti Skënderbeu”, “Vesli Klark”, segmentin e rrugës “Kadri Zeka”, “Nazmi Aliu”, “Vicianë”, “Adnan Shyti”, “Hamdi Gashi”, “Rasim Pasoma” dhe segmentin e rrugës “Mbretëresha Teutë”, kurse në kuadër të lagjes përfshihen këto rrugë: “Blerim Zuqaku”, “Avni Saraçi”, “Bedri Pejani”, “Xhevat Uka”, “Ferat Mulaku”, “Bahtir Perçuku”, “Mensur Gërguri”, “Rushit Strocçi”, “Martirët Grabanica”, “Hamdi Gashi”, “Qamil Haziri”, “Sahit Avdulli”, “Hazir Kolla”, “Lulzim Jashari”, “Shaban Tahiri”, “Durrësi”, “Ramadan Kastrati”, “Hasan Tiku Shabani”, “Mustafë Januzi”, “Mehmet Bivolaku”, “Paria e Drenicës”, “Vehbi Hetemi”, “Hazir Gjaka”, “Ismet Haliti”, “Agim Islami”, “Sefer Duboci”, “Asllan Xhemajli” dhe “Vëllezrit Tahiri”.

5. *Lagjja Vicianë* kufizohet me rrugët: “Tahir Sinani”, “Çanakkala”, “Mehdi Zabeli”, segmentin e rrugës “Lumni Surdulli” dhe “Niman Ferizi”, rrugën “Faruk Beqiri” dhe “Xhavit Mulaku”, kurse në kuadër të lagjes përfshihen këto rrugë: “Indrit Cara”, “Daut Imeri”, “Martirët e Lirisë”, “Dëshmorët e Kombit”, “Shaban Polluzha”, “Ajet Gërguri”, “Shkolla e Parë Shqipe”, “Kongresi i Manastirit”, “Ferat Muja”, “Sadri Kapiti”, “Selmon Kostanica”, “Qemajl Shaqiri”, “Dituria”, “Avni Klinaku”, “Qerim Qerimi”, “Ahmet Uka”, “Balli Kombëtar”, “Agim Zeqiri”, “Bajram Latifi”, “Eset Ibrahim”, “Shaban Krasniqi”, “Hajriz Musa”, “Liman Bajram Hasani”, “Helge Onsrud”, “Toplica”, segmenti i rrugës “Lumni Surdulli”, rruga “Ejup Kasumi”, “Kadri Dushi”, segmenti i rrugës “Vëllezërit Melenica”, rruga “Ibish Dervishi”, “Jeton Tërrstena”, “Enver Tahiri”, “Shaban e Xhevat Musa”, “Sherif Dibrani”, “Gani Muli”, “Musa Hajdini”, “Ekrem Isufi”, “Selim Bislimi”, “Sherif Kolla”, “Rafet e Burim Rrahmani”, “Isuf Mehana”, “Halit Salihu”, “Hamdi Hajrizi”, “Hamdi Krasniqi”, “Jashar Jashari”, “Burim Hoxha”, “Mehdi Haziri”, “Rexhep Podvorica”, “Abit Kolla”, “Mehdi Musliu”, “Musë Hajrizi”, “Xhemajl Mehmeti”, “Dardania”, “Mehmet Akifi”.

6. *Lagjja Silnica* kufizohet me rrugët: “Enver Musa”, segmentin e rrugës “Lumni Surdulli”, “Zenullah Begu”, “Kadri Zeka”, “Hamit Hyseni” dhe “Niman Ferizi” “Lidhja e Lezhës”, kurse në kuadër të lagjes përfshihen këto rrugë: “Sejdi Beqiri”, “Rifat Galica”, “Mursel Istrefi”, “Mehmet Konjuhi”, “Koshtova”, “Mujë Ulqinaku”, “Mustafë Shyti”, “Halit Mikullovcçi”, “Shaban

Mlinaku”, “Fazli Shabani”, segmenti i rrugës “Lidhja e Lezhës”, rruga “22 Maji”, “Bajram Miftari”, “Mic Sokoli”, “Bajram Curri”, “Zymer Haliti”, “Rrahim Syla”, “Zymer Haziri”, “Adem Ademi”, “Fehmi Tahir Istrefi”, “Bekim Zenuni”, “Mursel Hyseni”, segmenti i rrugës “Isak Halili”, rruga “Hamit Zuqaku”, “Mehmet Xhema”, “Isë Mehmeti”.

7. *Lagjja Dardania* kufizohet me rrugët: “Tahir Sinani”, “Çanakkala”, “Rrustem Hyseni Historiani”, segmentin e rrugës ”Ukshin Hoti”, rrugën “31 Maji”, segmentin e rrugës ”Mehmet Kasumi”, rrugën “Vëllezërit Feka”, “Greva e Minatorëve” dhe segmentin e rrugës “Bahri Kuqi”, kurse në kuadër të lagjes përfshihen këto rrugë: “Patrioti”, “Halit Konjuhi”, “Zëri i Kosovës”, “Qazim Ademi”, “Hoxhë Brezhnica”, “Njazi Badivuku”, “Miftar Shaqiri”, “Bedri Krasniqi”, “Avni Feka”, “Sahit Krasniqi”, “Remzi Aliu”, “Fatmir Krasniqi”, “17 Shkurti”, “Behxhet Aliu”, “Martirët e Zogajve”, “Muharrem Parduzi”, “Bekim Berisha Abeja”, “Shala”, “Rexhë e Fadil Selmani”, “Ragip Musliu”, “Rasim Istrefi”, “Qazim Jashari”, “Xajë Jashari”, “Shefqet e Behxhet Cimili”, “Lutfi Musiqi”, “Lah Izmaku”, “Fexhrije Veseli Gërxhaliu”, “Sami Lahu”, “Shefki Grabanica”, “Zenun Gjocaj”, “Hajzer Neziri”, “Rifat Banjska”, “Muhamed Rashica”, “Sadri Klinaku”, “Sherif Galica”, “Bajram Gashi”, “Vëllezërit Muzaqi”, “Fehmi Tërrnava”, “Nazif Ismajli”, “Xhemajl Hyseni”, “Shkodra”, “Abaz Jashari”, segmenti i rrugës “Rahman Krasniqi”, rruga “Hajrë Hajra”, “Tivari”, “Fetah Hyseni”, “Hoxhë Beqir Rashica”, “Naip Rashica”, “Rizah Rashica”, “Avni e Bedri Rashica”, “Naman e Zylfije Konoviku”, “Zylfije Krasniqi”, “Avdyl Mehmeti”, “Aziz Halili”, “Musli e Selim Drevinja”, “Basri e Ali Hyseni”, “Hasan Rashica”, “Igballe Prishtina”, “Istref e Rexhep Haziri”, “Fadil Beqiri”, “Adnan Bunjaku”, “Osman e Shaban Bunjaku”, “Faik Konica”, “Enver e Zymer Prronaj”, “Deli e Ali Rashica”, “Musli Gërguri”, “Hysen e Xhevdet Hyseni”, “Vëllezërit Zeqiri”, “Zeqir Rashica”, “2 Maji”, “Idriz Kurti”, “Halim Behrami”, “Hazir Muli”, “Hashim Kolla”, “Hazir Gërguri”, “Kadri Bajra”, “Fatmir Ejup Gërxhaliu”, “Qazim Ferati” dhe “Xhemajl Gërxhaliu”.

8. *Lagjja Iliria* kufizohet me segmentin e rrugës: “Bahri Kuqi” dhe “Mbretëresha Teutë”, rrugën “Ana Lin”, kurse në kuadër të lagjes përfshihen këto rrugë: “Driton Merovci”, “Selim Muzaqi”, “Gjergj Fishta”, “Selman Miftari”, “Arsim Tahiri”, “Ferat Hasani”, “Sadri Jetullahu”, “Brukseli”, “Beshir Krasniqi”, “Fitim Dibrani”, “Sadik Idrizi”, “Sinan Haziri”, “Lutfi Islami”, “Abedin Ferizi”, “Trepça”, “Idriz Hasani”, “Mustafë Çuka”, “Nysret Zymberi”, segmenti i rrugës “Boletini”, rruga “Azem Bejta”, “Shotë Galica”, “Adem Demiraj”, “Sefedin Morina”, “Jonuz Jashari”, “Sabri Behrami”, “Imer Sheshivari”, “Demir Halili”, “Naim Zahiti”, “Muhamet Idrizi”, “Ejup Munishi”, “Nazmi Hyseni Popova”, “Hajriz Halili”, “Milaim Salihu”, “Mursel Krasniqi”, “Veli Xhafa”, “Mehmet Pashë Zogu”, “Ilaz Kodra”, “Isë Mërnica”, “Shefqet Karakashi”, “Halit Merovci”, “Hilmi Rrustemi”, “Selim Mërnica”, “Jakup Saraçi”, “Shaip Azemi”, “Ramë e Imrane Blakaj”, “Bajram Aliu”, “Rifat Krasniqi”, “Ahmet Hajra”, “Beqir Hyseni”, “Mirusha”, “Nezir Imeri”, “Haxhi Ibrahim”, “Ismail Galica”, “Selim Ferati” dhe segmenti i rrugës “Sekine Maxhuni”.

9. Për zbatimin e këtij vendimi obligohen: Drejtoria për Urbanizëm dhe Mbrojtje të Mjedisit, Drejtoria e Administratës, si dhe Drejtoria e Shërbimeve Publike.

10. Ky vendim hynë në fuqi shtatë (7) ditë pas publikimit në faqen zyrtare të Komunës së Vushtrrisë.

Në vazhdim kuvendi pas votimit me vota “unanime” aprovoi Rregulloren për Organizimin, Funkionimin dhe Bashkëpunimin e Komunës me Fshatrat, Vendbanimet dhe Lagjet Urbane.

12. Rishqyrtimi i vendimit nr.100/22 i datës 28.4.2022 për caktimin e lokacionit për ndërtimin e tregut të gjelbër për prodhime vendore në Vushtrri

Fortuna Krasniqi, drejtoreshë e DUMM-së - tha se në saje të vlerësimeve të bëra nga Ministria e Mjedisit, del se kjo e fundit ka kërkuar nga kuvendi që të heqë nga certifikata pronësore destimin e një pjese të parcelës, ku kultura figuron si shtëpi-ndërtesë, dhe destinimi të jetë tokë ndërtimore sipas instruksioneve ligjore të kësaj ministrie të linjës. Nga kjo kërkoi nga kuvendi që ta përmbushë obligimin ligjor për rishqyrtim dhe rivotim të këtij propozim-vendimi sipas vlerësimeve të bëra.

Sylejman Mehulli, anëtar i kuvendit – tha se sikur Drejtoria e Kadastrit t’i kishte kryer punët si duhet nuk do të kishte ardhur deri tek kthimi mbrapsht i këtij vendimi, por shihet se kjo drejtori nuk ka qenë në krye të detyrës dhe janë dal joprofesional. Po ashtu ai përsëriti se lokacioni i ndarë për treg është i papërshtatshëm dhe nuk i përmbush kushtet për një projekt të tillë.

Adnan Lahu, anëtar i kuvendit – tha se si rezultat i mospunës së Drejtorisë së Kadastrit, ky vendim po kthehet si i kundërligjshëm për disa herë më radhë, andaj grupi kuvendar i LDK-së nuk do ta përkrah këtë propozim-vendim sepse kemi të bëjmë me zhvillime joserioze nga ekzekutivi komunal.

Alban Tahiraj, i autorizuari i Kryetarit të komunës - njoftoi se në kuadër të takimit të kryetarëve të komunave të Republikës së Kosovës, me kryeministrin, shumica e kryetarëve të komunave kanë ngritur shqetësimin e tyre për kthimin mbrapsht të vendimeve të kuvendit të komunave për çështje teknike si vendime të kundërligjshme. Tutje shtoi se nuk mund të sfidohen afatet ligjore me shkresa zyrtare të ministrive siç po ndodh shpesh gjatë vlerësimeve ligjore që po bëjnë këto të fundit. Lidhur me vendimin që është objekt shqyrtimi në këtë mbledhje, shtoi se korrigjimi i kulturës, ka mund të bëhet me anë të një shkrese zyrtare nga ana e ministrisë së linjës dhe fare kjo pikë mos të rishshikohet dhe rivotohet në kuvend.

Në fund të debatit, lidhur me këtë pikë të rendit të ditës, kuvendi pas votimit me 15 vota “për”, 6 vota “kundër” dhe 5 vota “abstenim” vendosi me sa vijon:

1. Me këtë vendim plotësohet dhe ndryshohet vendimi i Kuvendit të komunës me Nr. të protokollit Nr.100/22, i datës 28.4.2022 sipas vlerësimeve ligjore të dhëna nga Ministria e Mjedisit, Planifikimit Hapësinor dhe Infrastrukturës lidhur me certifikatën e pronësisë në të cilën figuron që lloji i shfrytëzimit është Tokë Ndërtimore Shtëpi-Ndërtesë, ndërsa tani shfrytëzimi i këtyre parcelave është tokë ndërtimore. Parcela kadastrale P-70202016-00505-0 është bërë ndarja fizike dhe tani figuron si parcelë kadastrale P-70202016-00505-1, si dhe pjesë nga parcela P-70202016-00504-0. Lokacioni i ndërtimit dhe sipërfaqja e përgjithshme mbetet e njëjtë.

2. Për zbatimin e këtij vendimi: obligohen: Drejtoria për Urbanizëm dhe Mbrojtje të Mjedisit, Drejtoria për Ekonomi, Bujqësi, Pylltari dhe Zhvillim Rural, Drejtoria për Shërbime Publike, si dhe Drejtoria për Gjeodezi, Kadastër dhe Pronë.

3. Pjesë përbërëse e këtij vendimi janë: certifikata e pronës dhe kopja e planit.

4. Ky vendim hynë në fuqi pesëmbëdhjetë (15) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe shtatë (7) dite pas publikimit në faqen zyrtare të Komunës së Vushtrrisë.

13. Të ndryshme

Fakete Dushi, anëtare e kuvendit - ngriti shqetësimin e banorëve të fshatit Shalle, lagjja “Dibrani”, të cilët kanë problem me rrjetin e energjisë elektrike, ku pajisjet elektrike të amvisërisë, nuk funksionojnë si pasojë e tensionit të ulët të energjisë, kështu që kërko që të merren masa. Po ashtu ajo parashtrroi një kërkesë të banorëve të fshatit Maxhunaj për ndërtimin e rr.”Shaip Imeri”.

Agron Përçuku, anëtar i kuvendit - pyeti drejtorin e Drejtorisë së Bujqësisë, lidhur me projektin subvencionimi me kultivatorë dhe freza, i cili ka qenë projekt nga mandati i kaluar dhe i tillë ka vazhduar edhe këtë mandat, dhe është pyetje e qytetarëve se deri ku ka shkuar ky projekt pasi që i njëjti nuk ka përfunduar akoma.

Ergin Sunguri, drejtor i DEBPZHR-së- u përgjigj në pyetjen e anëtarit të kuvendit z.Agron Perçuku.

Benjamin Shala, drejtor i DSHP-së- u përgjigj në pyetjen e anëtares së kuvendit znj. Fakete Dushi.

Sylejman Mehulli, anëtar i kuvendit - pyeti lidhur me projektin furnizim me kultivatorë, nga mandati i kaluar se a i janë paguar mjetet operatorit ekonomik që është dashur ta bëjë furnizimin. Nëse nuk janë realizuar mjete, të njëjtat a kanë shkuar në suficit dhe në këtë rast a është dëmtuar financiarisht komuna.

Ergin Sunguri, drejtor i DEBPZHR-së- u përgjigj në pyetjen e anëtarit të kuvendit z. Sylejman Mehulli.

Ymer Haradinaj, anëtar i kuvendit - pyeti lidhur me projektin zgjerim i rrjetit të ujësjellësit, familjet të cilat kanë participuar për kyçje në rrjet, a do t’ju kthehen mjetet financiare, kur dihet se në disa fshatra kanë paguar mjetet në masë mjaft të madhe e disa në masë më të vogël. Ndërsa sipas tij në një fshat janë grumbulluar mjetet financiare për kyçje në rrjet, kurse të njëjtat nuk janë derdhur në llogarinë e komunës.

Benjamin Shala, drejtor i DSHP-së- u përgjigj në pyetjen e anëtarit të kuvendit z. Ymer Haradinaj.

Sylejman Mehulli, anëtar i kuvendit - pyeti të autorizuarin e kryetarit të komunës lidhur me manifestimin “Ditët e Hasan Prishtinës” zyrtarët e komunës që kanë bërë vizita jashtë vendit a kanë marrë kompensim financiar.

Albanez Tahiraj, i autorizuari i Kryetarit të komunës - sqaroi se kompensimi dhe vizitat janë realizuar konform legjislacionit në fuqi.

Mbledhja përfundoi në ora: 14:00.

Bastri Duraku



Procesmbajtës

Melihate Basholli-Latifi



Kryesuese e Kuvendit

